



Rösti respunda a Candinas

In pur da Mustér ha fatg attent Martin Candinas ad in problem che pertutga mesiras da proteger muntaneras dal luf. Il politicher da l'AdC ha tematisà la chausa en il Cussegl naziunal. Il glindesdi ha Albert Rösti sco minister d'ambient dà scleriment.

CLAUDIA CADRUVI/FMR

Tschient dumondas en stadas tractandadas per l'ura da dumonda. Tantas vegn gnanc il Cussegl federal da responder – era cun discurre sc'ina pirla. Ma fin a la 27avla dumonda, quella da cusseglier naziunal *Martin Candinas* (AdC), ha il temp bastà il glindesdi.

Cussegl federal *Albert Rösti* ha furnì la risposta che pertutga indemnisaziuns per proteger muntaneras dal luf che vegnivan fin l'onn passà pajadas da l'Uffizi federal d'ambient (BAFU).

Dumonda critica

«Pertge per l'amur da Dieu porscha il BAFU nagin sustegniment pli per gidanters da pasturs?» era il titel da la dumonda che Martin Candinas ha inoltrà a scrit. «Noss purs prendan adina dapli mesiras per proteger las muntaneras. La lavur impundida è enorma, la pressiu corporala e psichica per ils pasturs è immensa. In med cumprovà è dad engaschar persunas che gidan. Quest sustegn effizient vul il BAFU stritgar», ha criticat il politicher sursilvan.

Martin Candinas ha vulì savair dal Cussegl federal: «Pertge prenda il BAFU ina tala decisiun che sa drizza cunter l'economia alpestra e la biodiversità? Sa il BAFU che las novas mesiras entaifer ils pajaments directs na tanschan betg per cumpensar il sustegniment che croda davent?»

Resposta cumplitgada

«L'engaschi da persunal che gida vegn vinavant sustegnì da la Confederaziun», ha respundì il minister d'ambient Albert Rösti. Il Cussegl federal haja transferì il sustegniment il novem-ber passà en il sistem da pajaments directs.

Ina nova disposiziun en l'ordinaziun per pa-

jaments directs pertutgia ils custs betg cuvrids dals singuls manaschis. «Tar gliez tutgan en spezial las mesiras per proteger las muntaneras ch'èn cumbinadas cun dapli lavur e cun ulteriur persunal d'alp», ha ditg Albert Rösti. Per questas indemnisaziuns na saja betg pli responsabel il BAFU, mabain l'Uffizi federal per agricoltura.

Perquai na possia il BAFU betg pli sustegnair ils gidanters sin las alps. «Ina finanziaziun dubla è esclusa», ha ditg Albert Rösti. «Il BAFU sustegna però vinavant mesiras per proteger muntaneras en il stretg senn dal pled, sco per exempel saivs supplementaras u programs spezial.»

Ponderar sch'i dovra ina moziun

In alp da Mustér saja pertutgada dal problem ed in pur l'haja fatg attent, ha ditg Martin Candinas a la FMR. *Markus Ritter* haja confermà ad el ch'i sa tractia d'in problem che pertutgia era autras alps. Perquai haja el tschentà la dumonda en il Cussegl naziunal.

Uss, suenter la risposta dad Albert Rösti, veglia el contactar l'uniun purila svizra e l'uniun purila grischuna per sclerir, sche quests pajaments directs cuvrian ils custs effectivs, di il cusseglier naziunal. El audia dals purs ch'ils pajaments na cuvrian betg ils custs. I fess gea fatal sch'i na vegnissan betg pli engaschads gidanters d'alp, perquai che la Confederaziun na paja betg avunda.

«Sch'i sa mussia ch'ins sto anc agir, lura stuain nus ponderar da far ina intervenziun, per exempel ina moziun», di Martin Candinas. «Purs che vulan proteger lur muntaneras, meritan da vegnir udids dals represchentants dal pievel e ch'ils parlamentararis portian lur gjavisch en la procedura parlamentara.»



**In chaun na basta savens betg. Sin alps dovri sper il pastur u la pastura magari anc in u l'uter gidan-
ter per proteger la muntanera dal luf.**

FOTO YANIK BÜRKLI/SOMEDIA